

SL(6)420 – Rheoliadau Ychwanegion Bwyd Anifeiliaid (Awdurdodiadau) (Cymru) 2023

Cefndir a diben

Mae'r Rheoliadau hyn yn awdurdodi, o ran Cymru, roi tri ar ddeg o ychwanegion bwyd anifeiliaid ar y farchnad.

Mae'r awdurdodiadau ar gyfer y canlynol:

- Ychwanegion maethol sy'n darparu microfaethynnau hanfodol i ddeietau anifeiliaid, fel asidau amino;
- Ychwanegion technolegol, fel ychwanegion silwair (sylweddau gan gynnwys ensymau neu ficro-organebau y bwriedir eu cynnwys mewn bwyd anifeiliaid i wella cynhyrchiant silwair);
- Ychwanegion sootechnegol, fel sylweddau sy'n gwella treuliadwyedd sydd, o'u bwydo i anifeiliaid, yn cynyddu treuliadwyedd deiet drwy eu rhoi mewn deunyddiau bwyd anifeiliaid targed a sylweddau sy'n dda i'r amgylchedd.

Maent hefyd yn darparu trefniadau pontio yn dilyn newid cod adnabod ar gyfer un ychwanegyn bwyd anifeiliaid a awdurdodwyd yn flaenorol i ganiatáu disbyddu stociau cyfredol, ac yn dirymu awdurdodiadau sydd wedi dod i ben.

Y weithdrefn

Negyddol.

Gwnaed y Rheoliadau gan Weinidogion Cymru cyn iddynt gael eu gosod gerbron y Senedd. Gall y Senedd ddirymu'r Rheoliadau o fewn 40 niwrnod (ac eithrio unrhyw ddiwrnodau pan fo'r Senedd: (i) wedi'i diddymu, neu (ii) mewn cyfnod o doriad am fwy na phedwar diwrnod) i'r dyddiad y'u gosodwyd gerbron y Senedd.

Materion technegol: craffu

Nodwyd y ddau bwynt a ganlyn i gyflwyno adroddiad arnynt o dan Reol Sefydlog 21.2 mewn cysylltiad â'r offeryn hwn.

1. Rheol Sefydlog 21.2(vi) – ei bod yn ymddangos bod gwaith drafftio'r offeryn neu'r drafft yn ddiffygiol neu ei fod yn methu â bodloni gofynion statudol

Yn rheoliad 2(3), diffinnir "*Rheoliad 1831/2003*" at ddibenion rheoliad 2 yn unig, gan fod rheoliad 2(3) yn dechrau â'r geiriau "*Yn y rheoliad hwn*". Fodd bynnag, defnyddir "*Rheoliad 1831/2003*" hefyd yn rheoliad 3(2) ac, at ddiben y rheoliad hwnnw, nid yw wedi'i ddiffinio ar hyn o bryd.



2. Rheol Sefydlog 21.2(vi) – ei bod yn ymddangos bod gwaith drafftio'r offeryn neu'r drafft yn ddiffygiol neu ei fod yn methu â bodloni gofynion statudol

Yn Atodlenni 3 a 4 i'r Rheoliadau hyn, yn nodyn (2) o'r tabl, cyfeirir at gyhoeddiad Sefydliad Safonau Prydeinig sy'n cynorthwyo'r darlennydd i ddeall y dulliau dadansoddi y cyfeirir atynt yn yr Atodlenni hynny mewn perthynas â phob ychwanegyn penodedig.

Yn y testun Saesneg, cyfeirir at y cyhoeddiad fel "*Animal feeding stuffs: Methods of sampling and analysis. Detection and enumeration of **Pediococcus spp.** used as feed additive*" (pwyslais wedi'i ychwanegu). Fodd bynnag, yn y testun Cymraeg, defnyddir "*Bacillus spp.*" yn hytrach na "*Pediococcus spp.*"

Mae angen esboniad am yr anghysondeb hwn rhwng y testunau Cymraeg a Saesneg gan ei bod yn ymddangos eu bod yn cyfeirio at gyhoeddiadau o dan deitlau gwahanol.

Rhinweddau: craffu

Nodwyd y pwynt a ganlyn i gyflwyno adroddiad arno o dan Reol Sefydlog 21.3 mewn cysylltiad â'r offeryn hwn.

3. Rheol Sefydlog 21.3(ii) – ei fod o bwysigrwydd gwleidyddol neu gyfreithiol neu ei fod yn codi materion polisi cyhoeddus sy'n debyg o fod o ddiddordeb i'r Senedd

Ni luniwyd asesiad effaith rheoleiddiol llawn. Mae'r Memorandwm Esboniadol yn egluro fel a ganlyn:

"Mae'r ASB [Asiantaeth Safonau Bwyd] wedi asesu'r effeithiau a fyddai'n deillio o awdurdodi'r ychwanegion bwyd anifeiliaid hyn. Roedd yr effeithiau a ystyriwyd yn cynnwys y rheiny a gafodd eu nodi amlaf fel effeithiau posib wrth gyflwyno neu ddiwygio cyfraith bwyd a bwyd anifeiliaid (er enghraifft, gwaith gweithredu awdurdodau lleol, iechyd, yr amgylchedd, twf, arloesi, masnach, cystadleuaeth, buddiannau defnyddwyr, a busnesau bach a micro). Ni wnaeth yr ASB nodi unrhyw effeithiau arwyddocaol, felly ni luniwyd asesiad effaith rheoleiddiol llawn. Mae hyn yn unol â'r polisi a nodir yng nghod ymarfer gweinidogion Cymru ar gyfer cynnal asesiadau effaith rheoleiddiol ar gyfer is-ddeddfwriaeth.

Yn gyffredinol, nododd yr ASB y dylai awdurdodi'r cynhyrchion hyn arwain at fwy o gystadleuaeth yn y farchnad, gan gefnogi twf ac arloesi yn y sector."

Ymateb Llywodraeth Cymru

Pwynt Craffu Technegol 1:

Ym marn y Llywodraeth mae'n glir bod y cyfeiriad yn rheoliad 3(2) at "Erthygl 14(4) (adnewyddu awdurdodiad) o Reoliad 1831/2003" yn cyfeirio at Erthygl 14 o Reoliad (EC) Rhif 1831/2003. Enwir y Rheoliad yn llawn yn y rhaglith. Mae troednodyn (1) i'r rhaglith yn nodi bod Erthygl 14 o'r Rheoliad hwnnw yn gymwys mewn perthynas ag adnewyddiadau.



Defnyddir "Rheoliad 1831/2003" hefyd i gyfeirio at y Rheoliad hwnnw yn rheoliad 2, ac fe'i diffinnir at ddibenion rheoliad 2. Ymhellach, mae'r Nodyn Esboniadol yn egluro effaith rheoliad 3(2) drwy enwi Rheoliad (EC) Rhif 1831/2003 yn llawn.

Mae'r Llywodraeth yn cydnabod y pwynt ond, ar ôl dadansoddi, mae o'r farn nad oes angen diwygio'r offeryn.

Pwynt Craffu Technegol 2:

Mae'r Llywodraeth yn cydnabod bod gwall yn nhroednodyn (2) o'r tablau yn Atodlenni 3 a 4 o destun Cymraeg yr offeryn.

Mae'r troednodyn o dan sylw yn y tablau hyn yn cyfeirio at Safon Brydeinig BS EN 15786:2021. Gwelir y gwall yn enw Saesneg y safon, a ddyfynnir. Ym marn y Llywodraeth mân wall yw hwn, sy'n amlwg i'r darllenydd, ac nid oes unrhyw risg o beri dryswch o ran y cyhoeddiad y cyfeirir ato. Mae Atodlenni 3 a 4 yn ei gwneud yn glir eu bod yn ymwneud ag ychwanegion bwyd anifeiliaid sy'n cynnwys straen o facteria o'r genws *Pediococcus*. Mae'r rhif BS EN a'r rhif ISBN yn gywir, a bydd y darllenydd yn cael hyd i'r cyhoeddiad cywir o chwilio am y naill neu'r llall.

Am y rhesymau a nodir uchod, mae'r Llywodraeth wedi penderfynu gadael yr offeryn fel y mae.

Trafodaeth y Pwyllgor

Trafododd y Pwyllgor yr offeryn gydag ymateb y Llywodraeth yn ei gyfarfod ar 8 Ionawr 2024 ac mae'n cyflwyno adroddiad i'r Senedd yn unol â'r pwyntiau adrodd uchod.

